

22 NOV 2001

Agong-Makam (Lead)

JENAZAH YANG DI-PERTUAN AGONG SELAMAT DIMAKAMKAN

KLANG, 22 Nov (Bernama) --- Jenazah Yang di-Pertuan Agong Sultan Salahuddin Abdul Aziz Shah selamat dimakamkan di Makam Diraja Klang di sini hari ini.

Jenazah baginda disemadikan bersebelahan makam ninda baginda, almarhum Sultan Alauddin Suleiman Shah dan ayahanda baginda almarhum Sultan Sir Hisamuddin Alam Shah.

Ketika jenazah baginda diturunkan dalam liang lahad, Raja Permaisuri Agong Tuanku Siti Aishah kelihatan menitikkan air mata tanpa henti.

Mufti Kerajaan Negeri Datuk Seri Mohd Tamyas Abdul Wahid membaca talkin dan mengetuai tahlil pada pemakaman baginda itu yang bermula pada 4.40 petang.

Sejurus selesai upacara pembacaan talkin, kedengaran tembakan meriam 67 das bagi menandakan berakhirnya upacara pemakaman itu.

Sultan Sharafuddin Idris Shah, yang baru dimasyhurkan sebagai Sultan Selangor, mengetuai kerabat diraja, sultan dan pembesar menabur bunga mawar dan merenjis air mawar di makam baginda.

Mereka termasuk Timbalan Yang di-Pertuan Agong Sultan Mizan Zainal Abidin dan Sultan Brunei Darussalam Sultan Hassanal Bolkiah, Sultan Perak Sultan Azlan Shah dan Sultan Kelantan Sultan Ismail Petra.

Turut menabur bunga dan merenjis air mawar ialah Perdana Menteri Datuk Seri Dr Mahathir Mohamad dan Timbalan Perdana Menteri Datuk Seri Abdullah Ahmad Badawi, serta Menteri Besar Selangor Datuk Seri Mohamad Khir Toyo.

Istiadat pemakaman itu tamat selesai pada 5.30 petang.

Sultan Salahuddin Abdul Aziz Shah, 75, yang juga Sultan Selangor, mangkat semalam di sebuah hospital swasta di Kuala Lumpur.

Terdahulu, setelah selesai istiadat pemasyhuran Sultan Selangor yang baru, jenazah almarhum diletakkan di dalam pedati "Seraja Diraja" sebelum ditarik perlahan-lahan menuju ke Makam Diraja sejauh 1.7 km.

Sepanjang kiri-kanan jalan, rakyat terdiri daripada pelbagai kaum dan peringkat umur berdiri memberi penghormatan terakhir kepada Almarhum sehingga tiba di perkarangan Makam Diraja, bersebelahan masjid Sultan Suleiman.

Antara ribuan rakyat jelata yang mengiringi perjalanan terakhir Almarhum termasuk sekumpulan golongan kurang upaya, anggota pertubuhan bukan kerajaan serta pasukan beruniform.

Cuaca cerah memudahkan istiadat pengusungan jenazah Almarhum ke tempat persemadian Seri Paduka dijalankan dalam masa 45 minit dengan sempurna.

-- BERNAMA

AKT HS NAK